



# **Iniziativa pil scamond da fiugs artificials**

**Revisiun parziala dalla lescha  
davart ils dis da ruaus publics**

**M E S S A D I**

dalla suprastanza communal a al cussegl da vischnaunca

Preziau signur president  
Stimadas signuras cusseglieras  
Prezai signurs cusseglers

## 1. Introducziun

Mesjamna, ils 24 da schaner 2024 ei vegniu inoltrau al president communal l'iniziativa per in "scamonda total da fiugs artificialas durant igl entir onn ora sin intschess dalla vischnaunca da Mustér".

Il scriver ch'ei vegnius inoltraus ensemen cun las gliestas da sutscriziun cuntegn suandonts motivs:

- Pliras vischnauncas han gia in scamond. Consequentamein eis ei da quintar ils proxims onns ch'ina ni l'autra persuna serendi en vischnauncas senza scamond per l'activitad da fiugs artificialas. Quei sa buca esser el senn dalla vischnaunca da Mustér.
- Fiugs artificialas cun bumbardem tementan animals da casa e la selvaschina.
- Fiugs artificialas stattan en cuntradiziun cullas mesiras che vegnan pridadas en favur dil clima.
- Suenten in di cun fiugs artificialas resta bia rumien anavos che vegn per gronda part buca allontanaus dallas persunas che han ars quels.
- Fiugs artificialas ein in prighel da fiug en temps schetgs, mo surtut era per baghetgs.

## 2. Constituziun communal - dretg d'iniziativa

### 2.1 Constituziun communal

La constituziun communal reglescha il dretg d'iniziativa sco suonda:

#### Art. 17

<sup>1</sup> 150 votants san far propostas en scret e pretender ch'ei vegni votau surlunder. Excepidas da quei dretg ein decisiuns ch'autoritads communalas han priu sin fundament da lur competenzas ni fatgs che reglan relaziuns denter la vischnaunca e tiarzas persunas.

<sup>2</sup> L'iniziativa ei era buca pusseivla encunter conclus dil cussegl da vischnaunca, ch'ei sutta mess tenor art. 21 al referendum facultativ.

<sup>3</sup> L'iniziativa sa vegnir inoltrada en fuorma d'ina proposta generala ni d'in sboz formulau. Ella ei d'inoltrar cun las sutscriziuns all'administraziun communal.

### 2.2 Verificaziun

L'administraziun communal ha verificau las gliestas da sutscriziun e confirmau che 155 votantas e votants han sutscret legalmein l'iniziativa inoltrada.

Endisch persunas han sutscret l'iniziativa senza esser legitimadas da votar ella vischnaunca da Mustér.

### 3. Constituziun communal - Procedura

#### 3.1 Constituziun communal

La constituziun communal reglescha la procedura d'ina iniziativa sco suonda:

##### Art. 18

<sup>1</sup> Ina iniziativa valeivla sto vegnir tractada sil pli tard enteifer sis meis sunter ch'ella ei vegnida inoltrada. Schai la proposta ella cumpetenza dalla suprastanza ni dil cussegl da vischnaunca e corrispunda l'autorità cumpetenta ad ella, croda ina votaziun dil pievel.

<sup>2</sup> Croda ella denton ella cumpetenza dil pievel, ni corrispunda l'autorità cumpetenta buca al giavisch, predeliberescha il cussegl da vischnaunca la proposta. Quel sto suttametter il punct da recapitulaziun cun in pareri ed eventualmein cun ina cunterproposta alla votaziun dil pievel.

<sup>3</sup> Ei ina cunterproposta avon maun, vegn ei suttamess als votants sil medem cedel da votar las suandontas damondas:

1. Vuleis Vus acceptar l'iniziativa dil pievel?
2. Vuleis Vus acceptar la cunterproposta dil cussegl da vischnaunca?
3. Pil cass che ton l'iniziativa dil pievel sco era la cunterproposta dil cussegl da vischnaunca vegnan acceptadas, duei l'iniziativa dil pievel u la cunterproposta passar en vigur?

<sup>4</sup> Il pli absolut vegn eruius separadamein per mintga damonda. Damondas buca rispundidas vegnan buca risguardadas.

<sup>5</sup> Vegnan aschibein l'iniziativa sco la cunterproposta acceptadas, decida il resultat dalla tierza damonda. En vigur va quei project che contonscha las biaras vuschs tier quella damonda

#### 3.2 Constataziuns

La suprastanza constatescha il suandont:

- L'iniziativa ei valeivla.
- La proposta schai ella cumpetenza dil cussegl da vischnaunca.

### 4. La suprastanza communal ei gia vegnida activa

A caschun dalla seduta da suprastanza dils 8 da schaner 2024 ha la suprastanza priu suandonta decisiun e communicau quella el FUS:

#### **Scamond d'envidar fiugs artificial che caschunan canera**

"Per motivs dil schurmetg digl ambient e dils animals decretescha la suprastanza communal naven d'immediat sigl entir intschess dalla vischnaunca da Disentis/Mustér in scamond da barschar fiugs artificial che caschunan canera (rachetas etc.). Fiugs artificial sco sbrenzlas ni vulcans restan lubi, cun quei ch'els caschunan minimas immissiuns da canera ed il rufid sa vegnir dismiss controlladamein."

## **5. Cunterproposta dalla suprastanza communal**

La suprastanza communal ha fatg ina cunterproposta als responsables dall'iniziativa. Quei cun argumentar che buca tut ils fiugs artificiali caschunien canera e rufids nuncontrollai. Cunzun fiugs artificiali sco sbrenzlas ni vulcans, ch'ins sa directamein dismetter suenter il diever, duein vinavon esser lubi. Fiugs artificiali che fan canera (rachetas etc.) duein esser scumandai igl entir onn ora sin intschess dalla vischnaunca da Mustér.

Persunter duei vegnir schaffiu in niev artechel ella lescha davart ils dis da ruaus publics.

Ils responsabels dall'iniziativa van d'accord da cumpletar la lescha davart ils dis da ruaus publics cun suandonta formulaziun d'in niev artechel.

## **6. Niev artechel ella lescha davart ils dis da ruaus publics**

La cunterproposta cul niev artechel secloma sco suonda:

### **Art. 7 Scamond fiugs artificiali**

<sup>1</sup> Duront igl entir onn ei per motivs dil schurmetg digl ambient e dils animals sigl entir intschess dalla vischnaunca scumandau da barschar fiugs artificiali che caschunan canera (rachetas etc.).

<sup>2</sup> Fiugs artificiali sco sbrenzlas ni vulcans restan lubi.

La completaziun dil niev artechel ha suandontas consequenzas ella lescha davart ils dis da ruaus publics:

Artechel 7 (vegl) → niev artechel 8

Artechel 8 (vegl) → niev artechel 9

## **7. Iniziativa**

Ils responsabels dall'iniziativa van d'accord cun la cunterproposta dalla suprastanza communal da cumpletar la lescha davart ils dis da ruaus publics cun il niev artechel suranumnu.

El cass che l'autorità cumpetenta, il cussegl da vischnaunca, sa s'accordar cun la cunterproposta vegn l'iniziativa retratga.

## **8. Ponderaziuns finalas**

La suprastanza communal ha suttemess tenor artechel 18 dalla constituziun communal ina cunterproposta al cussegl da vischnaunca (il gremi cumpetent) ed ei perschadida ch'il niev artechel corrispundi al temps dad oz.

## 9. Proposta

Sin fundament dallas ponderaziuns suramenziunadas

### **p r o p o n a**

la suprastonza communal al cussegl da vischnaunca:

1. d'approbar la revisiun parziala dalla lescha davart ils dis da ruaus publics;
2. da suttametter la revisiun parziala dalla lescha davart ils dis da ruaus publics al referendum facultativ tenor art. 21 lit. b dalla costituziun communal.

Suprastonza communal Disentis/Mustér  
Il president:

René Epp

Il canzlist:

Andri Hendry

Disentis/Mustér, ils 4 da zercladur 2024

- Lescha davart ils dis da ruaus publics revedida